



Reglur Kópavogsbæjar um fjárhagsaðstoð

I. KAFLI

Markmið, skilgreiningar og ábyrgð

1. gr.

Hverjum manni er skylt að framfæra sig, maka sinn og börn yngri en 18 ára. Markmið fjárhagsaðstoðar Félagsþjónustu Kópavogs er að tryggja að íbúar bæjarins geti séð fyrir sér og sínum með því að veita þeim þá fjárhagslegu aðstoð sem nauðsyn krefur. Jafnframt miðar þjónustan að því að styrkja íbúa til sjálfshjálpar og koma í veg fyrir að einstaklingar og fjölskyldur komist í þá aðstöðu að geta ekki ráðið fram úr málum sínum sjálf.

2. gr.

Fjárhagsaðstoð er veitt einstaklingum og fjölskyldum sem eiga lögheimili í Kópavogi samkvæmt lögum um félagsþjónustu sveitarfélaga nr. 40/1991 og þessum reglum. og í þeim tilgangi að tryggja fjárhagslegt og félagslegt öryggi:

- A. Þegar einstaklingar hafa ónógar tekjur sér til framfærslu og geta ekki séð sér og sínum farborða, sbr. IV. og VI. kafla laga um félagsþjónustu sveitarfélaga nr. 40/1991.
- B. Vegna sérstakra aðstæðna sbr. IV. kafla reglna þessara eða sérstakrar ákvörðunar félagsmálaráðs.

Telji starfsmaður dvöl umsækjanda í sveitarfélaginu, sem skráður er þar með lögheimili, ekki ígildi fastrar búsetu, sbr. ákvæði lögheimilislaga nr. 21/1990, skal tekin ákvörðun um hvort málið verði sent Þjóðskrá til nánari athugunar.

3. gr.

Þeim er sækir um aðstoð samkvæmt reglum þessum er skylt að leita sér atvinnu og taka þeirri atvinnu er býðst nema veikindi, örorka, aldur eða aðrar gildar vottfestar ástæður hamli því.

4. gr.

Fjárhagsaðstoð er ýmist í formi styrkja eða lána, en lán eru að jafnaði án vaxta. Fjárhagsaðstoð skal veitt sem lán ef umsækjandi óskar þess eða könnun á aðstæðum leiðir í ljós að eðlilegt er að gera kröfur um endurgreiðslur með tilliti til eigna og framtíðartekna.

Skilyrði fyrir fjárhagsaðstoð í formi láns er að umsækjandi notfæri sér greiðsluþjónustu banka eða sparisjóða enda liggja fyrir mat á endurgreiðslugetu umsækjanda.

Ef veita á fjárhagsaðstoð sem lán og fyrir liggur að umsækjandi er þegar með eldra lán hjá Félagsþjónustunni skal gera eldra lánið upp eða sameina það nýrri lánveitingu áður en nýtt lán er veitt.

5. gr.

Félagsmálaráð fer með stjórn Félagsþjónustunnar í umboði sveitarstjórnar. Félagsþjónustan sér um framkvæmd fjárhagsaðstoðar undir stjórn félagsmálaráðs. Starfsmönnum Félagsþjónustunnar er heimilt að afgreiða einstakar umsóknir um fjárhagsaðstoð samkvæmt reglum þessum. Ákvörðun um synjun fjárhagsaðstoðar verður skotið til félagsmálaráðs og ákvörðunum félagsmálaráðs til úrskurðarnefndar félagsþjónustu og húsnæðismála, sbr. 14. og 15. gr. reglna þessara.

6. gr.

Reglur um fjárhagsaðstoð samkvæmt III. og IV. kafla reglna þessara eru viðmiðunarreglur um framkvæmd fjárhagsaðstoðar Félagsþjónustunnar. Þeim er ætlað að vera starfsmönnum hennar til verksparnaðar og til að tryggja samræmi í framkvæmd aðstoðar.

II. KAFLI

Umsóknir og málsmeðferð

7. gr.

Umsóknir og fylgigögn

Við mat á beiðnum um fjárhagsaðstoð skulu ætíð liggja fyrir eftirtalin gögn:

- a. Umsókn undirrituð af umsækjanda eða talsmanni hans, þar sem fram koma upplýsingar um fjölskyldustærð, atvinnu og lögheimili.
- b. Skattframtal umsækjanda og maka hans og launaseðlar síðustu þriggja mánaða.
- c. Upplýsingar um bætur frá Tryggingastofnun ríkisins, lífeyrissjóðum, atvinnuleysistryggingum eða öðrum aðilum. Einnig upplýsingar um lánamöguleika þegar slíkt á við.

Víkja má frá framangreindum kröfum um framlagningu gagna sé um rökstutt neyðartilvik að ræða.

Í þeim tilvikum sem umsækjandi er atvinnulaus skal hann framvísa skráningarskírteini og dagpeningavottorði frá vinnumiðlun er staðfestir atvinnuleysi og atvinnuleit umsækjanda, en læknisvottorði ef um veikindi er að ræða.

Í þeim tilvikum að umsækjandi er erlendur ríkisborgari, ber honum að framvísa skírteini um dvalarleyfi. Erlendur ríkisborgari með dvalarleyfi sem hefur unnið á Íslandi samfelld í 12 mánuði eða lengur á rétt á fjárhagsaðstoð skv. reglum. Umsækjandi sem hefur fengið dvalarleyfi á þeim forsendum að skyldur aðili ábyrgist framfærslu hans, á að jafnaði ekki rétt til fjárhagsaðstoðar. Beri umsókn og fylgigögn hennar ekki með sér nauðsynlegar upplýsingar um framangreind atriði skal starfsmaður tilkynna umsækjanda um hvaða gögn skorti og hvaða afleiðingar slíkt getur haft. Jafnframt skal leiðbeina umsækjanda hvert hann skuli leita til að afla viðkomandi gagna eða til að fá nánari upplýsingar um réttarstöðu sína, sbr. 10. gr. þessara reglna.

Starfsmaður skal gera umsækjanda grein fyrir forsendum og markmiðum fjárhagsaðstoðar vegna hverrar umsóknar.

8. gr.

Rannsóknarskylda

Starfsmaður skal, ef þörf krefur, afla frekari upplýsinga um tekjur og eignir umsækjanda, svo sem hjá skattayfirvöldum, atvinnurekendum, Tryggingastofnun ríkisins, lífeyrissjóðum og Atvinnuleysistryggingasjóði. Einnig skal afla upplýsinga um önnur atriði, t.d. félagslegar aðstæður, eftir því sem umsókn gefur tilefni til.

9. gr.

Upplýsingaskylda

Skylt er að veita félagsmálaráði hverjar þær upplýsingar úr skattskýrslum þeirra sem leita fjárhagsaðstoðar eða hafa fengið hana. Sama gildir um upplýsingar úr skattskýrslum lögskylds framfæranda.

Neiti umsækjandi að veita upplýsingar um fjárhag sinn eða maka stöðvast afgreiðsla umsóknar hans.

Atvinnurekendum er skylt að láta félagsmálaráði í té upplýsingar um laun þess sem fjárhagsaðstoðar leitar og framfæranda hans.

10. gr.

Leiðbeiningar til umsækjanda

Við afgreiðslu umsóknar skal starfsmaður veita umsækjanda almennar upplýsingar um rétt sem hann kann að eiga annars staðar, t.d. hjá Tryggingastofnun, atvinnuleysistryggingum, stéttarfélögum eða tryggingarfélögum. Leiðbeina skal umsækjanda um hvert hann skuli leita til að fá nánari upplýsingar um réttarstöðu sína og ákvarðanir þar um eða eftir atvikum framsenda erindið til viðkomandi stofnunar og tilkynna umsækjanda um þá ákvörðun.

Starfsmaður skal hafa samvinnu við aðra opinbera aðila á sviði félagsþjónustu um skipulag þjónustu og málefni einstakra skjólstaðinga Félagsþjónustunnar.

11. gr.

Samþykkt aðstoð og tímamörk

Réttur til fjárhagsaðstoðar skapast í þeim mánuði sem sótt er um aðstoð og er að jafnaði um eftir á greiðslur að ræða. Ekki er skylt að veita fjárhagsaðstoð lengra aftur í tímann en tvo mánuði frá því að umsókn er lögð fram. Rökstuddar ástæður verða að réttlæta slíka aðstoð og verður skilyrðum fjárhagsaðstoðar að vera fullnægt allt það tímabil sem sótt er um.

Fjárhagsaðstoð skal að öllu jöfnu vera greidd einn mánuð í senn og skulu ákvarðanir um aðstoð að jafnaði ekki ná yfir lengra tímabil en þrjá mánuði. Að þeim tíma liðunum skal mál umsækjanda skoðað sérstaklega með tilliti til þarfa hans fyrir frekari fjárhagsaðstoð og annars konar ráðgjöf og stuðning. Í slíkum tilvikum skal gerð áætlun um frekari meðferð málsins og ef við á, vísa því m.a. til Ráðgjafastofnu heimilanna.

Í þeim tilvikum þegar umsækjandi fær jafnframt bætur frá Tryggingastofnun ríkisins og ljóst er að aðstæður hans muni ekki breytast, er heimilt að samþykkja aðstoð í sex mánuði í senn. Gildistími fjárhagsaðstoðar skv.IV. kafla reglna þessa er tveir mánuðir.

12. gr.

Rökstuðningur synjunar

Sé umsókn hafnað fær umsækjandi skriflegar upplýsingar þar sem forsendur synjunar eru rökstuddar ásamt tilvitnunum í viðeigandi greinar fjárhagsaðstoðarreglna.

Umsækjanda skal leiðbeint um málskotsheimildir um leið og honum er tilkynnt um slíka ákvörðun.

13. gr.

Rangar/villandi upplýsingar

Fjárhagsaðstoð veitt á grundvelli rangra eða villandi upplýsinga af hendi umsækjanda er endurkræf.

Hafi umsækjanda verið greidd hærri fjárhagsaðstoð en vera bar samkvæmt reglum þessum getur Félagsþjónustan endurkrafíð viðkomandi eftir almennum reglum kröfuréttar.

Liggi fyrir að ofgreiðslu megi rekja til rangra eða villandi upplýsinga fjárhagsaðstoðarþega er heimilt að draga upphæðina frá fjárhagsaðstoð sem umsækjandi kynni að öðlast rétt til síðar. Þó verður að gæta þess að ekki verði gengið lengra en svo við skuldajöfnuð að fjárhagsaðstoðarþegi geti áfram séð fyrir sér og sínum, sbr. 12. gr. laga nr. 40/1991.

14. gr.

Málskot til félagsmálaráðs

Synjun um fjárhagsaðstoð má skjóta til félagsmálaráðs Kópavogs, Fannborg 4. Skal það gert skriflega og eigi síðar en fjórum vikum eftir að viðkomandi barst vitneskja um ákvörðun.

15. gr.

Málskot til úrskurðarnefndar

Ákvörðun félagsmálaráðs má skjóta til úrskurðarnefndar félagsþjónustu og húsnæðismála, Hafnarhúsinu v/Tryggvagötu. Skal það gert innan fjögurra vikna frá því að viðkomandi barst vitneskja um ákvörðun. Málskot frestar að jafnaði ekki framkvæmd hinnar kærðu ákvörðunar.

III. kafli

Réttur til fjárhagsaðstoðar

16. gr.

Upphæðir fjárhagsaðstoðar

Framfærslugrunnur tekur mið af útgjöldum vegna daglegs heimilishalds og miðast við grunnfjárhæð kr. 142.020.-

- Framfærslugrunnur einstaklinga 18 ára og eldri sem sannanlega reka eigið heimili er 1,0. eða kr. 142.020.-
- Framfærslugrunnur einstaklinga 18 ára og eldri sem búa hjá öðrum og deila sannanlega kostnað af húsnæði er 0,5 eða kr. 71.010.-
- Framfærslugrunnur einstaklinga 18 ára og eldri sem leigja húsnæði án þinglýsts leigusamnings og sannanlega sýna fram á húsnæðiskostnað sem og þeirra sem ekki hafa aðgang að húsnæði er 0,8 eða kr. 113.616.-¹
- Framfærslugrunnur hjóna og fólks í sambúð 1,6 eða kr. 227.232.-

Umsækjandi sem ber sannanlega ekki kostnað vegna húsnæðis og fæðis en á við félagslega erfiðleika að etja og er án launatekna eða bótaréttar á rétt á greiðslum sem samsvara upphæð vasapeninga eins og hún er skilgreind hjá Tryggingastofnun ríkisins hverju sinni

¹ samþykkt í bæjarráði 2. febrúar 2012.

Frá upphæð fjárhagsaðstoðar dragast skattskyldar tekjur sbr. 18. gr. Upphæð fjárhagsaðstoðar er óháð því hvort barn eða börn búi á heimilinu. Með rekstri eigin heimilis er átt við þær aðstæður þegar viðkomandi býr í eigin húsnæði eða leigir húsnæði og leggur fram þinglýstan húsaleigusamning um húsnæðið, enda sé viðkomandi ekki í félagslegu húsnæði. Grunnfjárhæð fjárhagsaðstoðar tekur mið af neysluvísitölu í janúar 2012 og skal breytt 1. janúar ár hvert, í samræmi við hana.

Aðstoð við námsmenn fer eftir ákvæðum 23. og 26. gr.

Heimilt er að greiða dvalarkostnað fólks sem býr á áfangaheimili, í neyðarathvarfi eða á meðferðarheimili.

17. gr.

Skerðing fjárhagsaðstoðar

Hafni umsækjandi vinnu eða vinnumarkaðsúrræðum eða hefur verið settur á bið hjá Vinnumálastofnun skal fjárhagsaðstoð skerðast um helming þann sama mánuð og mánuðinn þar á eftir.

Geti umsækjandi ekki framvísað skráningarskírteini frá Vinnumálastofnun án viðunandi skýringa skal fjárhagsaðstoð lækka hlutfallslega fyrir umrætt tímabil.

Heimilt er að skerða fjárhagsaðstoð umsækjandi sem er í neyslu áfengis- eða annarra vímuefna um allt að helming.

Ef einstaklingur hefur þegið fjárhagsaðstoð í 3 mánuði á 12 mánaða tímabil skal gera samning um félagslega ráðgjöf sem hefur hjálp til sjálfshjálpar að markmiði. Hafni viðkomandi slíku er heimilt að lækka fjárhagsaðstoð um helming, eða henni verður hætt enda liggi fyrir rökstuddar ástæður af hálfu stofnunarinnar.

18. gr.

Tekjur umsækjanda/maka

Allar tekjur einstaklings/maka í þeim mánuði sem sótt er um og mánuðinum á undan koma til frádráttar við ákvörðun um upphæð fjárhagsaðstoðar.

Með tekjum er átt við allar skattskyldar tekjur einstaklings/maka s.s. atvinnutekjur, allar skattskyldar tekjur TR, greiðslur úr lífeyrissjóðum, atvinnuleysisbætur, leigutekjur, mæðra- og feðralaun og framlag til menntunar eða starfsþjálfunar samkvæmt 62. gr. barnalaga nr. 76/2003 sem ungmenni 18-20 ára kunna að fá.

Greiðslur vegna barna og húsaleigubætur og vaxtabætur reiknast ekki til tekna.

19. gr.

Eignir umsækjanda/maka

Eigi umsækjandi maki hans eða sambýlingur eignir umfram íbúðarhúsnæði sem umsækjandi eða fjölskylda hans býr í eða hafi hann nýlega selt eignir sínar skal umsækjanda að jafnaði vísað á lánaþyrirgreiðslu banka og sparisjóða þó að tekjur viðkomandi séu undir viðmiðunarmörkum.

20. gr.

Meðlagsgreiðslur umsækjanda

Þegar umsækjandi er undir eða á viðmiðunarmörkum fjárhagsaðstoðar er heimilt að taka tillit til meðlagsgreiðslna sem umsækjandi hefur greitt reglulega, a.m.k. undanfarandi 4 mánuði, fram að þeim tíma að hann fær fjárhagsaðstoð. Hér er átt við áfallandi meðlagsgreiðslur hverju sinni, en ekki uppsafnaðar meðlagsskuldir.

Slíkar greiðslur skulu greiddar til Innheimtustofnunar sveitarfélaga.

21. gr.

Kostnaður vegna húsnæðis

Við afgreiðslu fjárhagsaðstoðar er gert ráð fyrir að kostnaði umsækjanda vegna húsnæðis verði mætt með greiðslum húsaleigu- eða vaxtabóta.

22. gr.

Atvinnurekendur, sjálfstætt starfandi einstaklingar, hlutastörf

Atvinnurekandi eða sjálfstætt starfandi einstaklingur á kost á fjárhagsaðstoð hafi hann hætt rekstri og leitað réttar síns til atvinnuleysisbóta í samræmi við ákvæði laga nr. 12/1997 um atvinnuleysistryggingar

Sé umsækjandi í hlutastarfi með tekjur undir grunnfjárhæð skal gerð krafa um að viðkomandi skrái sig hjá vinnumiðlun og óski eftir fullu starfi.

23. gr.

Námsmenn

Einstaklingur er stundar nám sem lánshæft er hjá L.Í.N. nýtur ekki fjárhagsaðstoðar. Aðrir námsmenn eiga ekki kost á fjárhagsaðstoð til framfærslu nema fullnægt sé skilyrðum 26. gr. reglna þessara um námsstyrki/lán vegna náms.

24. gr.

Fangar

Einstaklingar sem afplána dóma eiga ekki rétt á fjárhagsaðstoð. Með samfélagsþjónustu er verið að afplána refsivist þannig að þeir sem afplána refsivist með samfélagsþjónustu eiga heldur ekki rétt á fjárhagsaðstoð.

IV. kafli

Heimildir vegna sérstakra aðstæðna

25. gr.

Aðstoð við einstaklinga yngri en átján ára

Einstaklingur yngri en 18 ára á að jafnaði ekki rétt á fjárhagsaðstoð í eigin nafni. Hafi einstaklingur yngri en 18 ára forsjá barns skal viðkomandi þó reiknuð fjárhagsaðstoð til framfærslu að fullu, að öðrum skilyrðum uppfylltum, en hálfu búi hann á heimili með öðrum. Einnig er heimilt að veita meðlagsskyldum unglingi yngri en 18 ára aðstoð til greiðslu meðlags að öðrum skilyrðum uppfylltum. Heimilt er að veita foreldri 16-17 ára námsmanns sem býr í foreldrahúsum lán eða styrk vegna námsins hafi foreldri/ tekjur undir grunnupphæð. Skal þessi aðstoð miða að því að greiða áætlaðan bókakostnað og skólagjöld námsmannsins.

26. gr.

Námsaðstoð

Í samræmi við það markmið laga um félagsþjónustu sveitarfélaga að hvetja einstaklinginn til ábyrgðar á sjálfum sér og styrkja hann til sjálfshjálpar er Félagsþjónustunni heimilt að veita þeim aðstoð til náms, sem eiga við erfiðar félagslegar aðstæður að etja. Heimild þessari verður aðeins beitt í tengslum við

umsókn viðkomandi um fjárhagsaðstoð og að umsækjandi sé með tekjur undir grunnupphæð samkvæmt reglum þessum.

Við ákvörðun um beitingu heimildar til að veita fjárhagsaðstoð vegna náms ber að taka mið af því fjármagni sem ætlað er til slíkrar aðstoðar í fjárhagsáætlun hverju sinni.

Að uppfylltum skilyrðum samkvæmt 1. og 2. mgr. er heimilt að veita lán eða styrk vegna náms til fólks sem og ekki hefur lokið grunnskóla eða framhaldsskóla vegna félagslegra erfiðleika. Heimildin á við eftirtalin tilvik:

- a. Þegar einstaklingur er atvinnulaus án bótaréttar eða þiggur fjárhagsaðstoð og hefur ekki lokið grunnnámi sem gefur rétt á námsláni
- b. Þegar um er að ræða einstætt foreldri sem ekki hefur lokið grunnskóla eða framhaldsskóla og hefur haft atvinnutekjur sem eru lægri en grunnfjárhæð fjárhagsaðstoðar undanfarna sex mánuði.

Aðstoð vegna náms skal miðast við grunnupphæð fjárhagsaðstoðar og eftir aðstæðum bókakostnað og/eða skólagjöld. Tekjur umsækjanda koma til frádráttar, sbr. 18. gr. reglna þessara.

Hámark bókakostnaðar skal vera kr. 25.000.-. Hámark skólagjalda skal vera kr. 20.000.-

Miða skal að því að námið leiði til starfs eða þess að viðkomandi geti síðar hafið lánshæft nám. Ákvarðanir samkvæmt þessu ákvæði skulu teknar fyrir hverja önn, en komi til fjárhagslegs stuðnings skal miðað við tvær annir. Leggja þarf inn umsókn tveimur mánuðum áður en nám hefst.

Forsenda námsaðstoðar er að námsmaður sýni fram á eðlilega skólasókn og námsframvindu skv. reglum viðkomandi skóla. Að öðrum kosti fellur fjárhagsaðstoð niður

27. gr.

Húsbúnaðarstyrkur/lán

Húsbúnaðarstyrkur/lán má veita í eftirfarandi tilvikum:

- a. Eignalausum einstaklingi sem er/á undir viðmiðunarmörkum og sem er að hefja búskap eftir a.m.k. tveggja ára dvöl á stofnun. Hámarksupphæð er kr. 100.000.-
- b. Einstaklingi sem er að flytja á sambýli eða sértækt búsetuúrræði. Hámarksupphæð er kr. 80.000.-.
- c. Eignalausum einstaklingi sem er að hefja búskap í fyrsta sinn og á við mikla félagslega erfiðleika að etja og er með tekjur á/undir viðmiðunarmörkum. Hámarksupphæð er kr 100.000.-.

Húsbúnaðarstyrkur greiðist aðeins í eitt skipti.

28. gr.

Greiðsla sérfræðiaðstoðar

A. Lán/styrkur til greiðslu tannlækninga.

Heimilt er undir sérstökum kringumstæðum, að veita umsækjanda sem hefur tekjur á eða undir viðmiðunarmörkum lán eða styrk til nauðsynlegra tannlækninga. Einnig er heimilt að greiða hlut foreldris í tannlæknað kostnaði barna ef foreldri hefur tekjur á eða undir viðmiðunarmörkum. Við ákvörðun um beitingu þessarar heimildar skal

viðkomandi hafa notið fjárhagsaðstoðar í að minnsta kosti 6 mánuði eða hafa verið án atvinnu í 18 mánuði.

Hámark aðstoðar skal vera kr. 80.000,- á ári. Með umsókn skal fylgja kostnaðaráætlun tannlæknis..

B. Lán eða styrkur til greiðslu viðtala hjá sérfræðingum.

Heimilt er að veita umsækjanda sem á við verulega erfiðleika að etja lán eða styrk til niðurgreiðslu viðtala hjá sálfræðingum, geðlæknum og félagsráðgjöfum með framhaldsmenntun í meðferð og skal sú heimild bundin samningi um félagslega ráðgjöf eða stuðningsvinnu, sbr. 34. gr. og þá aðeins ef:

- a. einstaklingur hefur mátt búa við mikla félagslega erfiðleika í uppeldisaðstæðum.
- b. Þegar einstaklingur eða fjölskylda hefur orðið fyrir alvarlegum áföllum, svo sem skyndilegum ástvinamissi eða alvarlegu ofbeldi.

Hámark aðstoðar skal vera kr. 8.000 kr. á viðtalstíma. Að jafnaði skal veita aðstoð að hámarki fimm tíma í senn, en að hámarki tíu tíma á ári.

29. gr.

Útfararstyrkir/lán

Heimilt er að veita lán eða styrk vegna útfarar þegar sannreynt hefur verið að dánarbú getur ekki kostað útför hins látna.

Eftirfarandi gögn þurfa að fylgja umsókn um útfararstyrk:

- a. Staðfest ljósrit af skattframtali hins látna, launaseðlar og greiðslufirlit frá tryggingum og lífeyrissjóðum.
- b. Staðfesting frá stéttarfélagi um rétt til útfararstyrks. Styrkur frá stéttarfélagi kemur til frádráttar frá aðstoð félagsþjónustunnar.
- c. Tilkynning sýslumanns um skiptalok á grundvelli eignayfirlýsingar, sbr. 25. gr. laga um skipti á dánarbúum o.fl. nr. 20/1991, eða einkaskiptaleyfi útgefið af sýslumanni til erfingja skv. 31. gr. og sbr. 28. gr. sömu laga.

Heimilt er að veita eftirlifandi maka lán vegna útfarar þegar eignir dánarbús hrökkva ekki til og eignir eftirlifandi maka eru ekki umfram íbúðarhúsnæði sem umsækjandi býr í, sbr. 18. gr.

Miðað skal við meðalkostnað útfarar. Hámark aðstoðar er kr. 210.000,-.

30. gr.

Áfallaástoð

Einstaklingur sem er á eða undir viðmiðunarmörkum fjárhagsaðstoðar og verður fyrir skyndilegum eignamissi vegna bruna, veikinda eða annarra áfalla á kost á láni eða styrk, allt að kr. 140.000,-. Sama gildir ef rýma þarf húsnæði umsækjanda af heilbrigðisástæðum.

Hafi umsækjandi tryggingu sem líklegt er að bæti tjónið skal aðstoð veitt með láni sem endurgreiðist þegar tryggingafélag hefur innt bótagreiðslu af hendi.

31. gr.

Aðstoð til fyrirframgreiðslu húsaleigu og tryggingavíxlar

Gerri leigusali kröfu um fyrirframgreiðslu húsaleigu er heimilt er að veita umsækjanda sem hefur tekjur á eða undir viðmiðunarmörkum um fjárhagsaðstoð eða hefur ekki

möguleika á fyrirgreiðslu í banka og er með gildan húsaleigusamning lán til fyrirframgreiðslu húsaleigu. Hámarkslán er allt að kr. 200.000.-

Að jafnaði skulu húsaleigubætur viðkomandi greiðast til Félagsþjónustunnar þar til lánið er að fullu greitt. Ákvarðanir um fyrirkomulag greiðslna húsaleigu félagslegs leiguhúsnæðis er í reglum um útleigu á félagslegum leiguíbúðum. Viðkomandi sem hefur áður fengið lán vegna þessarar greinar fær ekki aftur lán skv. greininni fyrr en fyrra lán er greitt upp. Gildur húsaleigusamningur þarf að liggja fyrir til a.m.k. 6 mánaða.

Með gildum húsaleigusamningi er að jafnaði átt við þinglýstan húsaleigusamning. Heimilt er að gangast í ábyrgð vegna kröfu Húsnæðisdeildar Kópavogs um að leigjendur félagslegs húsnæðis leggi fram tryggingavíxil ef umsækjandi er með tekjur undir eða við grunnupphæð og á ekki kost á fyrirgreiðslu. Þessi fyrirgreiðsla skal að jafnaði vera hluti af umfangsmeiri félagslegri aðstoð.

32. gr.

Lán/styrkur vegna sérstakra erfiðleika

Heimilt er að veita lán eða styrk, allt að kr. 90.000.- að uppfylltum eftirfarandi skilyrðum:

- a. Að tekjur umsækjanda séu á eða undir viðmiðunarmörkum.
- b. Að fyrir liggi yfirlit starfsmanns Félagsþjónustunnar eða Umboðsmanns skuldara um fjárhagsstöðu umsækjanda
- c. Að umsækjandi hafi ekki fengið fyrirgreiðslu skv. þessari grein undanfarna 12 mánuði.
- d. Að umsækjandi hafi ekki aðgang að lánaforingri banka, sparisjóða eða annarra lánastofnana
- e. Að fyrir liggi samningur um félagslega ráðgjöf eða fjármálaráðgjöf, þar sem það á við.

Styrkur/lán kemur að jafnaði aðeins til álita sýni umsækjandi fram á að lán eða styrkur muni breyta skuldastöðu umsækjanda til hins betra þegar til lengri tíma er litið. Þegar um lán er að ræða skal greiðslumat og greiðsluáætlun fylgja með umsókn.

33. gr.

Sérstök aðstoð til foreldra vegna barna á þeirra framfæri

Þegar ljóst þykir að stuðningur við börn er nauðsynlegur vegna alvarlegra greiðsluerfiðleika foreldra, er heimilt að víkja frá skilyrðum um grunntekjur og veita foreldrum barna aðstoð til greiðslu eftirfarandi:

- a. Daggæslu barna í heimahúsum.
- b. Leikskólagjalda.
- c. Skólamáltíða.
- d. Dægradvalar í skóla.
- e. Áframhaldandi tómskundaiðkunar barna.
- f. Skólagjalda og bókakostnaðar í framhaldsskóla.

Heildartekjur einstæðs foreldris með eitt barn mega að hámarki nema kr. 252.480 á mánuði en samanlagðar tekjur hjóna/sambúðarfólks með eitt barn kr. 391.344 á mánuði. Tekjuviðmið hækka um kr. 21.040 með hverju barni til viðbótar. Með

heildartekjum samkvæmt þessari grein er átt við launatekjur, atvinnutekjur, bótagreiðslur frá TR, greiðslur úr lífeyrissjóðum, atvinnuleysisbætur, leigutekjur, mæðra- og feðralaun og menntunarlífeyri og jafnframt greiðslur vegna barna eins og meðlög, barnabætur og umönnunarbætur. Aðstoð er að jafnaði veitt í 3 mánuði. Ekki þarf að liggja fyrir samningur um félagslega ráðgjöf.²

34. gr.

Sérstök aðstoð vegna endurhæfingar

Heimilt er að veita sérstaka aðstoð í málum þar sem einstaklingur tekur þátt í markvissum stuðningi, svo sem vegna námsaðstoðar sbr. 26. gr., sérfræðiaðstoðar sbr. 28. gr. og atvinnu- eða námstengdum átaksverkefnum. Skilyrði er að umsækjandi eigi, eða hafi átt í miklum félagslegum erfiðleikum og hafi, að mati ráðgjafa, raunverulegan áhuga á endurhæfingu. Gerður skal samningur um endurhæfingu þar sem fram kemur í áætlun markmið, tímaáætlun, ábyrgð viðkomandi og tilgreind tegund aðstoðar, eftirfylgni og reglubundið mat á árangri.

Heildarkostnaður getur numið allt að kr. 220.000 á mánuði, að meðtöldum atvinnu- eða námstengdum átaksverkefnum.

Kostnaður vegna þessarar greinar skal rúmast innan fjárhagsáætlunar hverju sinni.

35. gr.

Jólastyrkur

Jólastyrkur nemur 25% af grunnaðstoð og er að jafnaði einungis veittur þeim sem eiga við sérstaka félagslega erfiðleika að etja og hafa verið undir eða á viðmiðunarmörkum fjárhagsaðstoðar undanfarna 6 mánuði. Sækja þarf sérstaklega um jólastyrk.

V. kafli
Gildistími

36. gr.

Grunnupphæð fjárhagsaðstoðar tekur mið af neysluvísitölu og skal breytt 1. janúar ár hvert í samræmi við hana.

Reglur þessar sem settar eru samkvæmt 21. gr. laga um félagsþjónustu sveitarfélaga nr. 40/1991 voru samþykktar í bæjarráði 30. desember 2003 og með breytingum þann 3. febrúar 2005, 6. október 2005, 21. janúar 2009, 1. febrúar 2011 og 20. september 2011. Breytingar samþykktar í Bæjarstjórn þann 27. september 2011. Breytingar samþykktar í bæjarráði 2. febrúar 2012.

² Breyting samþykkt í bæjarráði 2. febrúar 2012